

## Hase unn aach Hinkel

Omm Somsdaach hott misch de Schorsch oogerufe unn gefroochd: Honnes, kennsde merr heit moie e bissi helfe? Donn breng e gud Beißzong unn fessde Hondschuh mett.

E Beißzong ferr doi Modell vunn de Pendelbohn? habb isch gefroochd.

De Schorsch hott nor geknorrd: Naa, nitt doodeferr, unn hott uffgeleeschd.

Also habb isch merr e Beißzong unn Hondschuh geschnabbd unn bin bein Schorsch gefahrn. Die Hofdier hott uffgestonne unn isch habben hinne im Gadde erumworschdele heern. Mitte uff soim Rase hott enn Haufe Bretter gelesche, er selbst hott e Brett vor sisch gehalle unn hott mettere Beißzong Neeschel erausgezooche, unn noochdem isch Gemoie gesaad hadd, habb isch gefroochd: Was hosde donn doo ferr Bretter mett Neeschel droi? Wo hosden die her unn was willsden mett dene mache?

Babbel nitt su vill, hott de Schorsch gesaad, zieh doi Hondschuh oo unn helf merr, die Neeschel aus dene Bretter erauszeh.

Isch zieh merr die Hondschuh oo unn greif merr e Brett. In dem warn vorne unn hinne unn aach in de Mitt Neeschel droi, jeder su ebbes iwver vier Zontimeter long.

De Schorsch seet: Klobb erst mette Zong hinne uff die Spitz von su emm Naachel, donn konnsden vorne besser erauszeh.

Ich habb also oogefonge, unn wenn aus emm Brett die Neeschel eraus warn, habb ischs newerm Schorsch soim Gaddezaun geleschd, oons uffs onnern.

Willsde e Bier drinke, hott misch noch ooner Weil de Schorsch gefroochd, iss in soin Keller gonge unn hott drei Flasche Bier unns Kättche mettgebroschd. Mir drei hawwe uns uff e Bonk gesetzt, de Schorsch hott die Flasche uffgemacht unn mir hawwe Prost! gesaad unn enn gude Zuuch aus de Flasch genumme.

Donn froochts Kättche: Was hälsden vunn dem?

Isch saach: Glaab merrs, isch waaß nitt wasser mett dene ville Bretter mache will, er hott merr noch nix gesaad.

Heer doch uff mett dem, seets Kättche, jetzt hotter soi Modell vunn de Pendelbohn ferdisch unn jetzt fängder mett dem oo.

Ei mett was donn?, frooch isch.

Dess Kättche hott geschnaufft. Doo hotter doch in de Zeidung gelesche, weil e paar Atomkraftwerke abgeschalt sinn, deets Stromausfall gewwe, unn der kennt donn aach schunn emol drei Daach dauern. Unn weilde in dere Zeit nix oikaafe konnsd unn doi Zeisch in de Kiehltruh kabuttgieht, sollt merr sisch dehoom ebbes hieleesche, was hält unn vunn dem merr drei Daach long esse unn drinke kann.

Ja, seet doo de Schorsch, dess werdd schlimm. Unn dessdeweese bau isch merr mett dene Bretter enn Hasestall, zieh noch e bissi Droht drumerum ferr Hinkel, unn wenn donn de Strom ausfällt, kenne merr enn Has schlachte odder e Hinkel, dess Fleisch kenne merr uff unserm Probankocher koche unn wenn onnern Leit vorm Rewe stieh unn wadde bis der widder uffmähd, kenne mir unn unser Kinner uns was ze esse mache. Nor Wasser muss isch merr noch holle, so hunnert Flasche, weil donn joo aach koo Wasser aus emm Kroone kimmt. Unn nodierlich aach genuch Bier.

Mensch Schorsch, saach isch, werrds su schlimm weesche emm Stromausfall?

De Schorsch hott noch enn Schluck aus soiner Bierflasch genumme, iss uffgestonne unn hott gesaad: Ess werdd noch schlimmer. Auf, mache merr weider. Wenn moi Hinkel erst emol leesche due, kriehsde aach e paar Eier.

Eiern Honnes